

Mien - Baeng Ging-Sou - Soldiers Scriptures

E^fe^so 6:10-18

- 10 Setv mueiz yie kuinx meih mbuo, meih mbuo oix zuqc kaux Ziouv Yesu yaac longc ninh nyei domh qaqv benx mienh henv mienh.
- 11 Oix zuqc zorqv Tin-Hungh bun nyei yietc zungv mborqv jaax nyei wuoqc ginc zorng jienv. Meih mbuo ziouc haih souv duqv wuonv, ngaengc jienv mienv nyei hungh guv guaix nyei za'eix.
- 12 Weic zuqc mbuo maiv caux baamh mienh mborqv jaax. Se caux yiem ndaamv-lungh zoux hlo nyei, maaih lingc maaih qaqv gunv naav hmuangx haic nyei baamh gen wuov deix, caux yietc zungv waaic haic nyei mienv mborqv jaax.
- 13 Weic naav oix zuqc zorqv Tin-Hungh bun daaih mborqv jaax nyei yietc zungv wuoqc ginc zorng jienv. Taux wuov norm orqv haic nyei hnoi meih mbuo ziouc haih caux wuov deix win-wangv doix-dekc. Zoux liuz nyungc-nyungc meih mbuo corc haih yiem duqv wuonv nyei.
- 14 Hhangv naaic, souv wuonv maah! Longc zien leiz zoux houx-hlaang sai jienv jaaiv. Longc zoux horpc nyei jauv zoux hlieqv-jaapv buang jienv la'kuotv.
- 15 Yaac oix zuqc zanc-zanc liuc leiz ziangx zunh baengh orn nyei kuv fienx weic zoux heh daapc.
- 16 Maiv daan mbuoqc naav. Oix zuqc longc sienx fim zoux torngv-baaih nanv jienv ziouc haih mietc hieuang orqv wuov dahu maaih douz nyei forng-cang.
- 17 Oix zuqc longc njoux en zoux hlieqv-muoc ndongx jienv. Yaac nanv jienv Singx Lingh nyei nzuqc ndaauv, se dongh Tin-Hungh nyei waac.
- 18 Oix zuqc kaux Singx Lingh zanc-zanc weic nyungc-nyungc jauv daux gaux tov Tin-Hungh. Weic naav oix zuqc ging jienv hnyouv daux gaux, maiv dungx guangc. Oix zuqc maiv dingh liouh nyei weic Tin-Hungh nyei zuangx mienh daux gaux.

Singx Nzung 91:1-16

- 1 Haaix dahu yiem Hlang Jiex Wuov Dauh nyei torngv laangh dorngx, se zanx yiem Nernh Jiex Wuov Dauh nyei dongh linh gu'nyuoz,
- 2 wuov dahu ziouc gorngv mbuox Ziouv, "Meih se yie ndaauh kaux nyei dorngx, caux weih wuonv nyei dorngx, yie nyei Tin-Hungh, dongh yie kaux wuov dahu."
- 3 Ninh oix njoux meih simv ndutv zaeng norqc mienh nyei koux, caux doqc haic nyei wuon-baengc.
- 4 Ninh zungv longc ninh nyei ndaatv gomv jienv meih. Yiem ninh nyei ndaatv ga'ndiev ziouc bun meih maaih ndaauh kaux nyei dorngx. Ninh ziepc zuoqv nyei hnyouv zoux domh torngv-baaih, fiuv-torngv-baaih beu jienv.
- 5 Meih yaac maiv zuqc gamh nziex lungh muonz-zanc nyei heiv sic, fai lungh hnoi zanc buonv daaih nyei forng-cang,
- 6 fai lungh muonz zanc daaih nyei domh wuon-baengc, fai lungh aanx zanc bun mienh zuqc mietc nyei zeqc naanc.
- 7 Nziex haih maaih yietc cin dahu mienh king njiec meih nyei ga'hlen, yietc waanc dahu king njiec meih nyei mbiaauc maengx, mv baac naav deiv sic maih daaih

nitv fatv meih.

- 8 Meih ganh nyei m'zing ziouc mangc buatc winh bun orqv mienh zuqc dingc nyei zuiz.
- 9 Weic zuqc meih bun Ziouv, zoux meih ndaauh kaux wuov dauh, se Yiem Hlang Jieux Wuov Dauh, benx meih yiem nyei dorngx,
- 10 maiv maaih haaix nyungc ciouv nyei sic ndortv zuqc meih. Maiv maaih haaix nyungc siem nyei zeqc naanc daaih nitv fatv meih nyei biauv,
- 11 weic zuqc Tin-Hungh oix paaiv ninh nyei fin-mienh goux jienv meih, beu jienv meih maiv gunv meih mingh taux haaix.
- 12 Ninh mbuo oix longc buoz bouh jienv meih, maiv bun meih nyei zaux zong zuqc la'bieiv.
- 13 Meih oix caaiv sienh caux naang-jieqv, oix ndamc sienh lunx caux domh naang.
- 14 Tin-Hungh gorngv, "Weic zuqc ninh longc hnyouv hnamv yie, yie ziouc dau ninh. Yie oix beu jienv ninh, weic zuqc ninh nyiemc yie nyei mbuox.
- 15 Se gorngv ninh heuc yie, yie ziouc dau ninh. Ninh buangh zuqc haaix nyungc naanc zingh, yie oix caux ninh yiem. Yie oix njoux ninh yaac taaih ninh.
- 16 Yie oix bun ninh buangv eix duqv siouc nyuonh ndaauv, yaac bun ninh buatc yie nyei njoux en."

Singx Nzung 18:1-50

- 1 O Ziouv aac, meih zoux yie nyei qaqv. Yie hnamv meih.
- 2 Ziouv zoux yie nyei la'bieiv, yie kaux wuonv nyei dorngx caux njoux yie wuov dauh. Yie nyei Tin-Hungh, se yie nyei la'bieiv, dongh yie ndaauh kaux wuov dauh. Ninh zoux yie nyei torngv-baaih, zoux qaqv njoux yie, zoux wuonv nyei dorngx beu yie.
- 3 Yie heuc Ziouv, dongh puix duqv mienh ceng wuov dauh. Ninh yaac njoux yie biaux ndutv yie nyei win-wangv.
- 4 Maaih haih daic nyei qaqv hnangv hlaang nzenc jienv yie, zuqc mietc nyei jauv hnangv wuom-laangc beqv yiemx jienv yie.
- 5 Yiemh gen nyei hlaang nzenc jienv yie, haih daic nyei qaqv hnangv mungz nor zaux jienv yie.
- 6 Zuqc kouv nyei ziangh hoc yie heuc jienv tov Ziouv. Yie heuc jienv tov yie nyei Tin-Hungh tengx. Ninh yiem ninh nyei singx dinc gu'nyuoz muangx haiz yie nyei qieq. Yie heuc jienv ninh nyei qieq bieqc taux ninh nyei m'normh.
- 7 Wuov zanc ndau-beih zuqc mbungh mbungh mbienv-mbienv nyei, mbong nyei gorn-ndoqv yaac zuqc ndanc dongz nyanh nyanh nyei, weic zuqc ninh qieq jiez.
- 8 Douz-sioux yangh ninh nyei mba'zorng cuotv. Ninh nyei nzuih cuotv haih buov qui nyei douz, douz-taanx yaac zuqc wuov deix douz zieqc jienv.
- 9 Ninh bun lungh nqoi ziouc njiec daaih, maaih mbuonx-jieqv yiem ninh nyei zaux-ndiev.
- 10 Ninh geh ke^lu^mbim ndaix mingh, ninh bangc nziaaux nyei qaqv siepv-siepv nyei daaih.

- 11 Ninh bun hmuangx om ninh nyei sin, maaih wuom nyei mbuonx-jieqv torngv jienv ninh.
- 12 Yiem ninh nyei nza'hmien nyei njang, maaih borqc caux zieqc jienv douz nyei taanx cunx tong ninh nyei mous.
- 13 Ziouv yiem gu'nguaaic lungh gorngv cuotv hnangv mba'ong mbui. Yiem Hlang Jiex Wuov Dauh heuc cuotv ziouc maaih borqc caux zieqc jienv douz nyei douz-taanx.
- 14 Ninh buonv cuotv ninh nyei forng-cang zoux bun win-wangv nzaanx. Ninh borngz mba'lingc njapc njapc nyei, haeqv win-wangv lunc nzengc.
- 15 O Ziouv aac, meih hatc hniev nyei, meih biomv meih nyei qiex yangh meih nyei mba'zorng cuotv. Koiv-ndoqv ziouc hinc cuotv daaih, ndau nyei gorn-ndoqv yaac cuotv daaih nqaengc nyei.
- 16 Ninh yiem gu'nguaaic hlang nyei dorngx sung buoz zorqv yie, yiem wuom-ndo nyei dorngx baeng cuotv daaih.
- 17 Ninh njoux yie biaux ndutv yie nyei henv haic nyei win-wangv caux nzorng yie wuov deix mienh, weic zuqc ninh mbuo gauh henv jiex yie.
- 18 Yie zuqc zeqc naanc nyei hnoi-nyieqc ninh mbuo daaih hoic yie, mv baac Ziouv zoux yie kaux nyei dorngx.
- 19 Ninh dorh yie cuotv daaih taux norm jangv nyei dorngx. Ninh njoux yie weic zuqc ninh a'hneiv yie.
- 20 Ziux yie zoux duqv horpc, Ziouv bun zingh nyeic yie. Ziux yie maiv zoux dorngc, ninh winh bun yie.
- 21 Weic zuqc yie gan nzengc Ziouv nyei doz yie maiv zoux waaic ngaengc yie nyei Tin-Hungh.
- 22 Ninh nyei yietc zungv leiz yiem yie nyei nza'hmien, yie yaac maiv guangc ninh nyei leiz-nyeic.
- 23 Yie yiem ninh nyei nza'hmien maiv maaih dorngc nyei dorngx. Yie yaac goux longx ganh, maiv zoux dorngc zuiz.
- 24 Weic naaiv, ziux yie zoux duqv horpc, yaac ziux ninh mangc, buatc yie cing-nzengc, Ziouv winh bun yie.
- 25 Weic ziepc zuoqv nyei mienh meih ziepc zuoqv nyei daaix ninh mbuo. Weic maiv maaih dorngx nqemh nyei mienh, meih bun cing meih ganh maiv maaih dorngx nqemh.
- 26 Weic cing-nzengc wuov deix, meih bun cing meih ganh cing-nzengc. Weic hnyouv njuotv nyei mienh, meih yaac bun cing meih ngaengc ninh mbuo.
- 27 Meih njoux nyiemc ganh zoux faix nyei baeqc fingx, mv baac m'zing-jaax hlang wuov deix, meih zatv ninh mbuo njiec.
- 28 Meih diemv zieqc yie nyei dang. Ziouv, yie nyei Tin-Hungh, ziux yie hmuangx nyei dorngx njang daaih.
- 29 Yie bangc meih ziouc haih mborqv duqv jun-baeng. Yie kaux yie nyei Tin-Hungh haih biu jiex zingh laatc.
- 30 Naaiv dauh Tin-Hungh, ninh nyei doz dunh yunh nyei. Ziouv laengz nyei waac, buatc za'gengh zien nyei. Ninh zoux torngv-baaih weic yietc zungv ndaauh kaux ninh nyei mienh.

- 31 Cuotv liuz Ziouv, haaix dauh zoux Tin-Hungh? Cuotv liuz mbuo nyei Tin-Hungh, haaix dauh benx wuov norm La'bieiv?
- 32 Naaiv dauh Tin-Hungh bun yie maaih qaqv yaac bun yie nyei jauv baengh orn.
- 33 Ninh bun yie nyei zaux hnangv njaih nyeiz nyei deih nor caaiv duqv jienv, yaac bun yie haih yiem hlang nyei dorngx souv duqv wuonv.
- 34 Ninh njaux yie hoqc linc mborqv jaax, yie nyei buoz cingx daaih haih baeng dongh siqv juang-zinx.
- 35 Meih bun meih nyei njoux en weic zoux yie nyei torngv-baaih. Meih nyei mbiaauc jieqv buoz baav jienv yie. Meih tengx yie, bun yie duqv zoux hlo.
- 36 Meih bun yie nyei zaux caaiv nyei dorngx jangv, yie nyei zaux ziouc maiv piatv.
- 37 Yie zunc yie nyei win-wangv yaac zunc zaaic ninh mbuo. Yie maiv daaux sin nzuonx taux ninh mbuo zuqc baaic nzengc.
- 38 Yie mborqv ninh mbuo, ninh mbuo ziouc maiv haih jiez sin. Ninh mbuo king njiec yie nyei zaux-hlen.
- 39 Weic zuqc meih bun yie maaih qaqv mborqv jaax, meih bun daaih mborqv yie wuov deix zuqc yiem yie nyei buoz-ndiev.
- 40 Meih yaac bun yie nyei win-wangv huin nqaang biaux. Yie duqv mietc nzengc nzorng yie wuov deix.
- 41 Ninh mbuo heuc jienv tov tengx, mv baac maiv maaih mienh njoux ninh mbuo. Ninh mbuo heuc Ziouv, mv baac ninh maiv dau ninh mbuo.
- 42 Yie mborqv ninh mbuo muonc hnangv nziaux buonc nyei nie-mbung. Yie zorqv ninh mbuo zoi guangc hnangv jauv zaangc nyei wuom-bamc ndorng nor.
- 43 Meih njoux yie biaux ndutv, maiv zuqc baeqc fingx fiuv-nzaeng nyei sic. Meih bun yie zoux maanc guoqv nyei bieiv zeiv. Dongh yie maiv hiuv jiex nyei baeqc fingx fu-sux yie.
- 44 Ninh mbuo yietv muangx haiz yie nyei mengh dauh ninh mbuo muangx yie. Ganh fingx mienh daaih mbaapv njiec yie nyei nza'hmien.
- 45 Ganh fingx mienh hnyouv mau nzengc, sin zinx nyanh nyanh nyei yiem ninh mbuo wuonv nyei dorngx cuotv daaih.
- 46 Ziouv ziangh jienv. Oix zuqc ceng yie nyei La'bieiv. Oix zuqc taaih yie nyei Tin-Hungh, dongh njoux yie wuov dauh.
- 47 Se naaiv dauh Tin-Hungh tengx yie jaauv win, yaac bun maanc fingx zuqc yiem yie nyei buoz-ndiev.
- 48 Ninh njoux yie biaux ndutv yie nyei win-wangv, yaac bouh yie faaux gauh hlang jiex yie nyei win-jaa, meih njoux yie biaux ndutv doqc nyei mienh.
- 49 O Ziouv aac, weic naaiv yie ziouc yiem maanc fingx mienh mbu'ndongx ceng meih, yaac baaux nzung ceng meih nyei mengh.
- 50 Ninh ceix hlo haic nyei njoux en bun ninh nyei hungh diex, yaac bun cing ninh ziepc zuoqv nyei hnamv ninh longc youh orn daaih wuov dauh, se Ndaawitv caux ninh nyei hoz doic taux yietc liuz.

Pastor T. John Franklin
 Church of Salvation, Healing, and Deliverance
 COS-HAD.org